

04 AUG 2003

Sukan-Ras

RAS ADIBA SAHUT CABARAN MALAYSIA BOLEH

KUALA LUMPUR, 4 Ogos (Bernama) -- Atlet kurang upaya Ras Adiba Radzi akan mengembara secara solo selama dua minggu menggunakan kerusi roda sejauh 398 kilometer mulai 7 Ogos ini sempena menyahut cabaran Malaysia Boleh menerusi "Kembara Kerusi Roda 03".

Pengembaraan Ras yang juga atlet paralimpik dalam acara sukan menembak "Air Rifle Prone 10 Meter", akan meliputi jalan-jalan desa serta kawasan bukit bukau.

Timbalan Ketua Setiausaha Kementerian Belia dan Sukan Datuk Talaat Husain berkata kembara yang julung kali diadakan itu bertujuan meningkatkan kesedaran masyarakat tentang golongan Orang Kurang Upaya (OKU) selain mempromosikan gaya hidup sihat dan aktif OKU melalui aktiviti sukan.

"Kami berharap hasrat ini akan dapat memberi kesedaran kepada masyarakat tentang orang kurang upaya selain dapat meningkatkan azam untuk menghadapi cabaran Malaysia Boleh seperti ini," katanya pada sidang media di Kementerian Belia dan Sukan hari ini.

Kembara Kerusi Roda 03 ini merupakan antara program gerakan paralimpik negara 2010 yang bermatlamat untuk memartabat dan memperkasakan sukan untuk semua.

Pengembaraan ini juga bertujuan melakar rekod atlet wanita pertama berkerusi roda berjaya menyudahkan perjalanan jarak jauh bermula di Johor Baharu.

Kembara itu akan melalui beberapa pekan kecil seperti Pontian Kecil, Benut, Koris, Peserai (Johor), Sungai Rambai, Padang Temu, Sungai Udang, Pengkalan Balak (Melaka), Kuala Linggi, Pasir Panjang, Lukut, Tanah Merah (Negeri Sembilan), Sepang, Dengkil (Selangor) dan Putrajaya.

Ketibaan Ras di Dataran Putrajaya pada 20 Ogos ini dijangkakan akan disambut oleh Perdana Menteri Datuk Seri Dr Mahathir Mohamad yang juga merupakan penaung kepada program tersebut.

Ras akan diiringi sepanjang perjalanan oleh pembantu jurulatih, Md Sani Kasbun, yang juga orang kurang upaya, ibunya Siti Sariah Abu dan dua ahli fisioterapi Zanariah Daris dan Rosnah Mat Yatim.

Pada sidang media itu, Ras berharap program seumpama ini dapat menggalakkan orang ramai memberi sokongan sambil menderma.

Ras berkata antara aktiviti yang akan dilakukan sepanjang perjalanan itu ialah melawat universiti dan sekolah untuk memberi kesedaran kepada pelajar mengenai kebolehan orang kurang upaya.

Beliau berkata Persektuan Orang Kurang Upaya Malaysia juga akan membuat kutipan derma RM1 seorang bagi membolehkan persekutuan itu menjalankan aktiviti OKU.

"Saya tidak mensasarkan jumlah kutipan. Ia bergantung kepada sumbangan orang ramai," katanya.

-- BERNAMA

NKS SAK AHH LAT